

區澤


44.年生

現職／

電腦軟體工程師

作品／

「谷虛詩稿」



題兩當軒集

古典詩組佳作 區澤

題兩當軒集

謫仙詩逸仰未得，激揚跌宕師仲則。
煉石裁雲化秋風，龍蛇歌哭動天色。
山水淒晦袍劍寒，杯酒騎鯨傷膽肝。
斯文佔盡英雄氣，狂豪一紙星斗闌。
古調長吟出景致，崔嵬吾師識胸次。
側看魚龍入天涯，黃河仰俯書生淚。
從此一飲吸長虹，五湖浸月紫硯中。
可憐有句增寂寞，半世論文與詩翁。

中秋明月篇

君不見夕雲激湍九天瀉，龍蛇乘風攢大野。
君不見長空一洗星斗橫，江山悠悠明月生。
明月生兮天下白，邀左人兮為吾客。
清風濁酒宴黃英，千古悲歡同揮斥。
陶公謫仙豪於飲，適然對酌三百杯。
日濟滄海暮採菊，騎鯨不得歸去來。
東坡一樽酌江月，今夕何夕魚龍沒。
高寒皎皎落孤身，松氣錚錚入幹骨。
青衫白髮豈匹夫，可憐書劍久塵蕪。
仲則有詩徘徊老，臨月歌哭動五湖。
莫悲秋，毋中酒，多少事，空回首。
且挾明月覽九州，東風西風舞楊柳。
山水得意綠如醇，百川霞氣走京津。
天試豪傑關佳境，桃花洞外非復秦。
吾膺吾腦猶赤子，欲攬明月驅萬里。
興故土兮意未闌，化滄桑兮志可恃。
霜天子夜月愈圓，筆芒猶射冲嬋娟。
此夕豪情應記取，且吟中秋明月篇。

感懷

少年多夢逐開山，萬里長風不肯還。
豈有硯池磨舊戟，何堪瓦釜怨紅顏。
魂兮岌岌魚龍老，血或溶溶弓馬閒。
明日為誰披意氣，黃梁一枕上征鞍。

雨後

湯湯腥水綠浮煙，
山雨山風爭自然。
未必豪情生氣概，
龍蛇吟過是秋蟬。

無題

澀詩吟倦抱嗟哦，
拍案無心思翳多。
壁鏡生塵藏古月，
青燈紫硯自消磨。